

Date – 01/09/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. CAG audit report chuan chhiatna thleng thei laka invenna lam buaipuitu State Disaster Management authority leh a hnuai a committee dangte hnathawh dukhawp lohna nasa tak a tarlang.
2. Kumin thla sarih chhung hianan Mizoramah HIV hri kai mi 611 hmuhchhuah a ni.
3. Prime Minister Narendra Modia leh Chinese President Xi Jinping te chuan ramria remna leh muanna vawnnun zel an remti..
4. China-a Tianjin-a SCO Summit neih karlakah hian PM Narendra Modia chuan ram hruaitu engemawzat an kawm.

<><><>

CAG - DISASTER

Tun assembly fur thutkhawm a Chief Minister Pu Lalduhoma'n a House dawhkana a dah Comptroller & Auditor General (CAG) audit report-ah chuan chhiatna thleng thei laka invenna lam buaipuitu State Disaster Management authority leh a hnuai a committee dangte hnathawh dukhawp lohna nasa tak tarlan a ni.

Nikum March thla tawpa Cyclone Remal a tleh avang leh a hnu zela ruah sur nasa avang mi 42 lai Mizorama an thih hnu, in pawh 5,938 lai a chhiat hnu, kuminah pawh fur ruahtui tla tam lutuk avanga mi 6 an thih a hmun 940 a leimin leh chhiatna dang dangin Mizoram pumah harsatna namen lo a siam lai-in CAG audit report chuan State Disaster Management Authority (SDMA), the State Advisory Committee (SAC) leh State Executive Committee (SEC) te chuan Disaster Management Act-in tihtur a tih angin thil an ti nep niin a sawi a. CAG report chuan state authority hian hmasawna hna thawh dawnin chhiatna thleng thei venna leh a lo thlen a chhiatna tihnep dan tur ruahmannate a en letsak ngai lova. Kum 2015 March ni 15-a Department Disaster Plan a kaihhruaina siam chu SEC din a nih hnu kum 8 zetah tihchhuah a ni. SEC hian kum 2017-18 leh 2021-22 inkar chhung khan inhmuhkhawm a buatsaih ngai lova, chhiatna thleng thei laka ruahmanna siam tura rawtna fumfe siam thei dinhmuna a ding lo a ni.

Hei bakah hian SEC hian hmasawna hna thawh dawna a him leh him loh tur National Building Code 2005 duhdan angin a duang ngai lova State Disaster Management Plan leh National Disaster Management Plan duhdan angin leimin duhna hmunte hunbi nei a endik a ni ngai hek lo. Aizawl Hunthar

venga lei tawlhna hmun a leilungte chu endik a ni na-in hmun dang erawh chu hlamchhiah a nih thu CAG report hian a tarlang bawh a.

SDMA hian lirnghing, leimin, tuilian, thlichhe tleh leh ruah bawhawk sur a lo thlena chet lak dan tur Standard Operating Procedure (SOP) hrang a siam hek lova, Mizoramah leimin a tam em em chungin a vilna atan 'automated landslide monitoring system' a la ruahman hek lo a ti.

Kum 2020-21 leh 2021-22 chhung khan medical leh police lam mite pualin mock drill a buatsaih ngai lova. Chhiatna lo thleng bika che tur State Disaster Response Force battalion din a la ni lova, police-te atangin helama hman tur training a pe ve chauh a ni. Hei bakah hian police zingah hmeichhiate training pek an la ni lova, National Disaster Response Fund (NDRF) sum hmanna-ah felhlal leh lei phal loh thil leite a awm bawh niin CAG report chuan a tarlang bawh a ni.

<><><>

BHARAT DARSHAN

Bharat Darshan Tour a kal tur Lunglei a School naupang BHSS leh Sacred Heart School naupang 20 te chu tukin khan Comdt 92 BN BSF Sanjay Chowhan an thlahna hun hmangin a vailiam.

Bharat Darshan a kal tur thlahna hunah hian Comdt. Sanjay Chowhan chuan Ministry of Home Affairs in Border a cheng te tan a he prog.hi a buatsaih a nih angin BSF kutah a dah a ni a ti. Khawdang a mi te nen zirlai 40 vel an kal dawn tih a sawi.

Dy Comd.Mobi pawhin fuihna thusawiin zirlai te chu hun vawngdik tur te leh midang nghah ngai a awm lo tur in a fuih a, Delhi a hmun pawimawh hrang hrang fanpui an ni dawn a ti a, hei bakah hian Minister of State for Home Affairs, DG BSF te leh mi pawimawh dang te an hmu dawn a, Delhi ah hian BSF Camp Chhola ah an awm dawn tih a sawi.

Bharat Darshan-a kal tur te hian tukin hian Aizawl an pan anga naktukah Larsap an hmu ang a, hemi hnu hian Delhi an pan ang.

<><><>

HIV

Kumin thla sarh chhung (January atanga July) khan Mizoramah HIV hri kai mi 611 hmuhchhuah a ni.

Integrated counselling & testing centre (ICTC) report danin kumin January leh July thla inkar chhung khan HIV hri kai mi 611 hmuhchhuah thar a awm a, hemi hun chhung vek hian HIV hrik pai mi 295 an thi. Kum 2020 atanga kumin July thla tawp thleng khan HIV hri kai mi 11,032 hmuhchhuah a ni a. Kum 2022-2023 tangka kum chhung kha HIV kai hmuhchhuah tam ber kum niin 2,388 hmuhchhuah a ni. Anti Retroviral Therapy (ART) Centre atanga report danin hemi hun chhung vek hian HIV hri kai mi 2,996 an thi a,

kum 2023 kha HIV hri kai thih tam ber kum niin hri kai mi 632 an thi a, a hma kum, 2022 khan mi 562 thi-in nikum khan mi 561 an thi baw a ni. ART Centre atang veka thu dawn danin tun dinhmuna hian HIV hri kai mi 19,837 an awm mek a. An zinga mi 18,694-te hian ART centre-ah ART enkawl na an dawng mek a, enkawl na dawng lo mi 1,143 an awm mek baw. ART enkawl na dawng lo zingah hian mahni duhthlanna ngei a la duh lo, hmun danga pem bo, an chin chhui zui theih loh, damdawi ngeih loh avanga doctor-in enkawl na an chawlh lailawktir leh Pathiana damna chang ni a inhria a damdawi a inenkawl na duh lote an ni hlawn.

Tun dinhmuna HIV hri kai mekte hi Aizawl district-ah tam berin mi 11,128 an awm a, Champhai district-ah 1,725, Kolasib district-ah 1,502 leh Lunglei district-ah 1,324 te an awm a. Hnahthial district-ah HIV hri kai awm tlem berin mi 284 an awm a ni.

<><><>

BORDER

Home minister Pu K. Sapdanga chuan Mizoram Sorkar in Mizoram-Assam ramri-a a pawm chu Kum 1875 August ni 20-a ‘Inner Line’ ti a vuah, Cachar district chhim lam ramri ti a a tarlan chin a ni, a ti.

Tun hnai a Assembly-a MNF member Pu K. Laldawngliana zawhna ziaka chhangin Pu K. Sapdanga chuan Mizoram leh Assam ramri chingfel tur hian state pahnih te hi kum 1988 atang khan vawi 10 (sawm) chuang an lo inbe tawh a. Kum 2024 August ni 09 khan Mizoram Sorkar leh Assam Sorkar aiawh te chuan Mizoram-Assam ramri buai chungchang sawiho turin Aizawlah state pahnih minister ve ve an inbe leh tawh a. Hemi hnu kumin April ni 25 khan Mizoram Sorkar leh Assam Sorkar aiawh official-te chu Mizoram leh Assam ramri buai chungchang sawiho in Guwahati-ah an inbe leh a ni, a ti a. Ramri buai chingfel tura state pahnih aiawh official-te inbiak lehna tur hi Mizoramin a thlen leh tura ruahman a ni a. A hun leh ni erawh ruat a la nih loh thu home minister hian a sawi baw.

Pu K. Sapdanga chuan ramri buai chingfel tur hian State pahnihte hian inbiakna bakah lehkha hmanga document te indil tawn leh inpe tawn a hmalak reng a nih thu a sawi a. Hemi atan hian Mizoram sorkar chuan Study Team din-in Study Team te hian India ram hmun hrang hrang atangin Mizoram tanhmun ti chak turin document-te lakhawmin hma an la reng a ni, a ti.

Mizoram-Assam ramri a Mizoram Sorkarin kawng a laih te hi a tul dan azirin hman leh enkawl zui zel an nih thu sawiin, state 2 te'n thuchhuah intawm an lo siam tawh avangin tuna thil awmdan pangngai pela lo chet rem lohna thenkhat a awm a, chuvangin inremna kalh zawnga chet a rem loh avangin enkawl leh hman zui remchang lo te pawh a awm niin a sawi a ni.

<><><>

BIOMETRIC ENROLMENT

July thla tawp atanga Myanmar atanga Mizorama rawn raltlan mit-naute leh kut ze thla lak hna chu a kal chak thei lo hle a, thla khat chuang chhungin raltlan 33,300 chuang zinga 6,370 chauh an mit-naute leh kutze thla lak an la ni.

Home department hotute hnen atanga thu dawn danin biometric enrolment han hi duh angin district hrang hrangah kalpui chak theih a ni lova, an harsatna tawh lian ber chu ‘Foreigners Identification Portal & Biometric Enrolment’ (FIP&BE) software hmanga hna an thawhna khawl hman chianguang lo leh internet signal tha tawh lote a ni a. Hei hian an hna a tithuanawp nasa hle niin district hrang hrang official-te chuan an sawi a. Relief camp-a awmte a hlawma endik an awlsam rualin an fate hmun danga lehkha zira awm an lo awm ve bawh avangin an biometric data lak kim a harsa an tih bakah chhungte leh thiante belte bakah mi in luaha awm hmun karkir tak taka awmte chu khawtlang hruaitute tanpuina an hmu chungin hun a duh hle niin an sawi bawh.

Ministry of home affairs duhdana biometric enrolment chauh kalpui tura ngaih a nih lai-in biographic data pawh lak khawm nghal a ni a. Raltlan hming, nu leh pa, a lokalna khua, Myanmar a a awm lai leh Mizoramah enge a thawh tihte lak zel a ni. Tun hma khan mimal chanchin chhinchhiah hna hi kalpui chhuah vek a ni tawh a, temporary identity card pawh pek chhuah deuh vek an ni tawh chungin an dinhmun hi a danglam reng avangin mimal chanchin chhinchhiah hi thar thawh leh a nih thu home department hotute chuan an sawi a ni.

Myanmar raltlan bakah hian Bangladesh Chittagon Hill Tracts atanga raltlan hi mi 3,000 tling lo an awma ngaih a ni a. Lawngtlai district-ah Bangladesh raltlan 2,000 chuang an awm a, Thenzawl khawpui-ah 299 awmin Lunglei district-ah Khawmawi khua-ah mi 63 an awm mek bawh a ni.

<><><>

MYANMAR REFUGEES

Home minister Pu K. Sapdanga chuan August ni 20 thleng khan Mizoramah Myanmar raltlan 33,329 an awm meka chhinchhiah niin a sawi.

He thu hi Assembly fur inkhawma rorellai ZPM MLA Pu VL Zaithanzama zawhna ziaka a chhanna-ah home minister hian a sawi a. Myanmar raitlan chhinchhiah hna (biometric enrolment) thawhna atan hian Central sorkar atangin a hranpa chuan sum hmuh a awm lo niin a sawi a. Raltlan chhinchhiah Mizorama District tinin an thawk tan tawh a. Chinchhiah hna zawh hun tur hi sawi theih a ni rih lo niin Pu K. Sapdanga chuan a sawi. India leh Myanmar inkar ramri chungchang chu Central Sorkar thuneihna a nih thu a sawi a. Central Sorkar hian ramri hungna tur hian State Sorkar leh Border Guarding Force (Assam Rifles) bakah Border Roads Organization te nena inrawn tlangin kalpui dan turah himalak mek a nih thu a sawi bawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia leh Chinese President Xi Jinping te chuan ramria remna leh muanna vawnnun zel an remti. Nimin khan PM Modia leh President Xi Jinping te hi Tianjin-a SCO Summit neih karlakah inbiain ramri chungchang bakah thil pawimawh tak tak an sawidun a. Ram pahnih inzahtawwna leh hlawkna tur inngaihtuahsak chung a thawhdunna tha neih zel an duh thu hruaitu pahnihte hian an sawi a. Eibar zawwna kawngah ram pahnihte pawimawhna leh khawvel sumdawwna huangah India leh CHina pawimawhziat an sawidun bawk a. Tun aia zau leh hlawk zawka sumdawwna lama thawhdun zel dan tur an rel bawk a ni.

<><><>

SCO SUMMIT

China-a Tianjin-a SCO Summit neih karlakah hian PM Narendra Modia chuan ram hruaitu engemawzat an kawm a. Heng zingah hian Maldives, Tajikistan, Kazakhstan, Belarus President te bakah Egypt leh Nepal Prime Minister te pawh a kawm a. Social media lama a tarlan danin Pu Modia hian heng ram hruaitute nen an inkawm thei chu lawmawm atih thu a sawi a. Kazakhstan President nen sector pawimawh tak taka an thawhdunna na sawidun tih a tarlang a. Tajikistan President nen sumdawwna leh hnam ziarang chawilar kawnga an thawhdunna thang zel an sawidun thu tarlangin Maldives President nen pawh ram pahnih thawhdunna tha tak avanga hlawkna an telte an sawidun a ti a. Nepal Prime Minister KP Oli nen ram pahnih inlaichinna thuk zia leh danglam zia an sawidun thu a tarlang bawk a ni.

<><><>

CENTRAL TEAM

Union Ministry of Home Affairs chuan Himachal Pradesh, Uttarakhand, Punjab leh Jammu and Kashmir-a ruahsur, tuilian leh leiminin chhiatna a thlente zirchiang tur team a din. Union Ministry thuchhuah danin heng Central Team te hian tuilenna leh leiminna district te hi an tlawh dawn a. Joint Secretary level officer ten team hi an ho zel dawn a ni.

<><><>